

आकाशवाणी

1. प्रधानमंत्री नरेन्द्र मोदी होरें वैश्विक दक्खन च विकास गी बढ़ावा देने लेई मनुक्खें पर केन्द्रित वैश्विक विकास समझौते दी तजवीज कीती ऐ।
2. इंडियन मैडिकल एसोसिएशन नै सेहत खेत्तर दे पेशेवरें खलाफ हिंसा पर रोक लाने लेई केन्द्री कनून आहने लेई प्रधानमंत्री हुंदे दखल दी मंग कीती ऐ।
3. रक्षा मंत्री राजनाथ सिंह होर अज्ज चेन्नई च भारती तट रक्षक बल दे भलेआं आधुनिक समुंद्री सुरक्षा तालमेल केन्द्र दा उद्घाटन करगन।
4. विदेश मंत्री डॉ. एस.जयशंकर होर अज्ज कुवैत दे अधिकारिक दौरे पर होंगन।
5. अमरीका दी अदालत आखेआ ऐ जे 26/11 आले मुंबई आतंकी हमले दे कसूरवार तहवुर राणा गी भारत दे हवाले कीता जाई सकदा ऐ।
6. भारत अपने 39 मैंबरी दल गी जूनियर बैडमिंटन प्रतियोगिता लेई भेजोग।

<><><><><><>

PM Modi

प्रधानमंत्री नरेन्द्र मोदी होरें वैश्विक दक्खन दे मुखें दा आह्वान कीता ऐ जे ओह इक दुए दी ताकत बनने लेई इकजुट होई जान। कल त्रिए वायस ऑफ ग्लोबल साउथ वर्चुअल सम्मेलन च अपने शुरूआती भाषण च उनें यक्कोतक्की ते चुनौतिएं भरोचे मजूदा आलमी माहौल पर बी चैता जाहर कीती। उनें आखेआ जे दुनिया अजें कोविड दे असर थमां पूरी चाल्ली बाहर नेई आई ऐ ते बक्ख-बक्ख खेत्तरें च होआ करदे टकरावें, वैश्विक दक्खन दे मुखें दी विकास यात्रा लेई बड़्डी चुनौती पैदा करी दिक्ती ऐ। श्री मोदी होरें जोर देइयै आखेआ जे एह मुख जलवायु परिवर्तन दे कन्नो कन्नी सेहत सुरक्षा, खादय सुरक्षा ते ऊर्जा सुरक्षा दिएं चैताएं दा सामना करै करदे न। प्रधानमंत्री होरें आखेआ जे आतंकवाद, उग्रवाद ते अलगाववाद समाज लेई गंभीर खतरे बने दे न। प्रधानमंत्री होरें भरोसा दोआया जे भारत वैश्विक दक्खन दे सब्बने मुखें कन्नै अपने तजुर्बे ते समर्थ गी सांझा करने लेई वचनबद्ध ऐ। उनें बपार, समावेशी विकास, टिकाऊ विकास दे लक्ष्यें दी प्रगति ते महिलाएं दे नेतृत्व च विकास गी बढ़ावा देने लेई भारत दी वचनबद्धता दा बी जिक्र कीता। उनें आखेआ जे हाल दे बरें च बुनियादी ढांचे, डिजीटल ते ऊर्जा कनेक्टीविटी दे राएं वैश्विक दक्खन कन्नै सहयोग गी बढ़ावा दित्ता गेआ ऐ। श्री मोदी होरें आखेआ जे मिशन लाईफ दे तैहत भारत नां छड़ा मुखें च सगुआं भ्याल मुखें च बी रूफटॉप सोलर ते अक्षय ऊर्जा उत्पादन गी प्राथमिकता देआ करदा ऐ। उनें आखेआ जे भारत नै वैश्विक दक्खन दे बक्ख-बक्ख मुखें गी यूपीआई कन्नै जोड़ने दे जतन बी शुरू कीते न। प्रधानमंत्री होरें आखेआ जे शिक्षा, समर्थ निर्माण ते हुनर दे खेत्तर च वैश्विक दक्खन दे मुखें कन्नै सांझ-भ्याली च खरी मती प्रगति दर्ज कीती गेई ऐ। उनें आखेआ जे भारत नै वैश्विक दक्खन च डिजीटल, सार्वजनिक बुनियादी ढांचे दे खेत्तर च प्रगति लेई इक समाजी कोष दी स्थाना कीती ऐ।

<><><><><><>

IMA-PM

इंडियन मैडिकल एसोसिएशन आईएमए नै पच्छम बंगाल दे आर.जी.कर मैडिकल कालेज मामले च प्रधानमंत्री नरेन्द्र मोदी होरें गी दखलअंदाजी करने दी मंग करदे होई डाक्टरें दी सुरक्षा ते अस्पताल च दुष्कर्म आले मामले च तेजिया नै न्यांह दोआने लेई चिट्ठी लिखी ऐ। संघ नै मंग कीती ऐ जे अस्पतालें दी सुरक्षा बवस्था हवाई अड्डें आला लेखा होनी लोड़चदी। उनें पीड़ित दे परोआर लेई बणकदे मुआवजे दी बी मंग कीती।

<><><><><><>

Doctors Strike

कोलकाता दे आर.जी.कर मैडिकल कालेज ते अस्पताल च डाक्टर कन्नै बलात्कार ते हत्या दे मामले च देस भरै च बक्ख-बक्ख डाक्टरें मंचें ते संघें अपना बरोध प्रदर्शन जारी रखेआ। आकाशवाणी संवाददाता नै दस्सेआ जे बक्ख-बक्ख शैहरें च छड़ा अमरजेंसी सेवां गै अस्पतालें च खुल्लियां न। आईएमए नै कल 24 घंटे दी हड़ताल दा आह्वान कीता हा। पच्छम बंगाल च सीबीआई सरबंधत मैडिकल कालेज दे प्रिंसिपल डॉ. संदीप घोष थमां पुच्छ गिच्छ करा करदी ऐ। अजेंसी दी दूई टीम अस्पताल च जांच ते इक होर टीम हिरासतै च लेते गेदे अरोपी संजय राय दे ठकाने पर ऐ। घटना दे सरबंधै च वामपंथी ते कांग्रेस अज्ज राज्य दे सब्बने जिलें च घटना दा बरोध करा करदे न। तोआई सत्तारूढ़ तृणमूल कांग्रेस नै बी घटना च शामिल अपराधिण गी फांसी देने दी मंग करदे होई कोलकाता च रैलिण कड़िडयां। मारे गेदी डाक्टर लेई न्यांह दी मंग करा'रदे हड़तालिएं इक जुटता दस्सने ताई तमिलनाडू च अज्ज निजी अस्पतालें च ओपीडी सेवां ते वैकल्पिक आपरेशन रद्द करी दित्ते न, महाराष्ट्र च डाक्टरें दे संगठन हड़ताल च शामिल होई गे न।

<><><><><><>

Rajnath Singh

रक्षा मंत्री राजनाथ सिंह होर अज्ज भारतीय तटरक्षक बल दे समुंद्री बचाह आपुं च तालमेल आले केन्द्र दा उद्घाटन करगन। श्री सिंह होर चेन्नई च समुंद्री प्रदूषण रोधी कारवाई केन्द्र दा बी उद्घाटन करगन। एहदे कन्नै टकोहदा करियै तटवर्ती इलाकें दे समुंद्री पानी च तेल ते रसैने दे रिसाव कन्नै निबड़ने च मदद थहोग। नमीं सहूलतां निगगर समुंद्री सुरक्षा जकीनी करने ते अमरजेंसी आले हालात च तुरत सेवा उपलब्ध करोआने लेई तैआर न। श्री सिंह होर मगरा सुरगीय एम.करूनानिधि हुंदी जन्म शताब्दी पर उंदे सम्मान च इक सिक्का बी जारी करगन।

<><><><><><>

Dr. Jaishankar

विदेश मंत्री डॉ. एस.जयशंकर होर अज्ज कुवैत दे सरकारी दौरे पर रवाना होआ करदे न। ओह कुवैत दे विदेश मंत्री अब्दुल्ला-अली-अल-याहया कन्नै मलाटी लांगन। डॉ. जयशंकर होर कुवैत दे उच्ची सतह दे लीडरें कन्नै बी मिली सकदे न। उंदे इस दौरे कन्नै दौनें देसं गी राजनीतिक, बपार, निवेश, ऊर्जा, सुरक्षा, संस्कृति ते जन संपर्क सनें होर दुए क्षेत्रें च सरबंधें दी समीक्षा करने दा मौका थहोग। दौनें देस आपसी हितें आले अंतर्राष्ट्रीय मुद्दें पर बचार ते पच्छम-दक्खन एशिया दिएं समस्याएं दे हल बारे बी गल्लबात करगन।

<><><><><><>

Nepal

नेपाल दे विदेश मंत्री डॉ. आरजू राणा देउबा 5एं दिनें दे सरकारी दौरे लेई अज्ज भारत पुज्जा करदे न। उंदी एह यात्रा विदेश मंत्री डॉ. एस.जयशंकर हुंदे साददे पर होआ करदी ऐ। विदेश मंत्रालय नै आखेआ जे गोआंढी पैहले नीति तैहत् भारत-नेपाल कन्नै नियमित तौरा पर गल्लबात करदा रौहदा ऐ ते श्री देउबा हुंदे दौरे कन्नै दौनें देसें गी आपसी सरबंधें गी होर बी निगगर करने दा मौका थहोग। नेपाल दे विदेश मंत्रालय आस्सेआ जारी इक ब्यानै मूजब श्री देउबा विदेश मंत्री डॉ. जयशंकर हुंदे कन्नै बैठकां लांगन।

<><><><><><>

Mumbai Terror

26 नवम्बर 2008 दे मुंबई आतंकी हमले दे आरोपी तहव्वुर हुसैन राणा गी अमरीका थमां भारत आन्नेआ जाई सकदा ऐ। अमरीका च कैलिफोर्निया दी अदालतै आखेआ जे भारत अमरीका प्रत्यार्पण समझौते तैहत् राणा गी भारत दे हवाले कीता जाई सकदा ऐ। मुंबई हमले च 160 लोक मारे गे हे। 63 बरें दी बरेसु दे राणा नै अपने आप गी भारत दे हवाले कीते जाने दी संभावना खलाफ अपील कीती ही। राणा इसलै लांस एंजेल्स दी जेलै च कैद ऐ। ओ पाकिस्तानी मूल दे अमरीकी नागरिक ते लश्करे तैयबा दे आतंकी डेविड कोलमैन हैडली दा करीबी ऐ। कोलमैन मुंबई आतंकी हमले दे मुख्य आरोपिं च शामिल ऐ। राणा पर आरोप ऐ जे ओंदे सरबंध पाकिस्तान दी खुफिया अजेंसी आईएसआई कन्नै न।

<><><><><><>

Russia

रूस दे पूर्वी तट पर अज्ज बडलै मुंह न्हरे भूंचाल दे झटके मसूस कीते गे, रिक्टर पैमाने पर इंदी तीव्रता 7 मापी गई ऐ। भूंचाल दा केन्द्र पेत्रापावलोस्क कमशाकी शैहर च 48 किलोमीटर दी गैहराई च दस्सेआ गेआ ऐं अमरीकी मौसम विभाग नै आखेआ जे भूंचाल ग्रस्त इलाके थमां 300 किलोमीटर तगर दे दायरे च सुनामी आई सकदी ऐ। उआं मगरा मैहकमे ने इस शैका गी नकारी दित्तां

<><><><><><>

Govt. FMB

मच्छी पालन, पशुपालन ते डेयरी मंत्री राजीव रंजन सिंह होरें 2030 तगर खुरपका ते मुंहपका बमारिं थमां छुटकारे लेई मैहकमे आस्सेआ कीते जा'रदे उपाएं दी समीक्षा कीती ऐ। श्री सिंह होरें गलाया जे पशुपालन देसै दी अर्थबवस्था ते करसानें दी रोजी रूट्टी दौनें लेई महत्त्वै आला ऐ। उनें खुशी प्रगट कीती जे जनोरें दे सब्बे टीके घरेलू सतह पर बनाए जा'रदे न। उनें गलाया जे खुरपका ते मुंहपका थमां बचाह लेई भिडें-बकरिं गी टीके लाने लाहने आला कम्म तेज कीता गेआ ऐ। लद्दाख च पैहले गै टीके लाहने आला कम्म चला करदा ऐ।

<><><><><><>

Jr. Badminton

15 ते 17 बरें दी उमरी थमां घट्ट दे बैडमिंटन खडारिएं दी चीन च शुरू होआ करदी प्रतियोगिता आस्तै भारत थमां 39 खडारिएं दा दल जा करदा ऐ। एह प्रतियोगिता 20 थमां 25 अगस्त तगर चीन च आयोजित होग। अगले बरें भारत जूनियर विश्व चैंपियनशिप दी मेजबानी करै करदा ऐ। इनें 39 खडारिएं दी ताल बेंगलुरु च कीती गई। अंडर-17 आले दल दी अगुवाई जी.दत्तू ते तनवी रेड्डी करगंन। तोआई अंडर-15 दी श्रेणी तैहत् भारत दी अगुवाई श्याम विडीगणविले ते तनवी पात्री सिंघला होर करगंन।

<><><><><><>